

四庫全書

集部

欽定四庫全書

滎陽外史集卷九十三

明 鄭真 撰

七言律詩

題墨窓卷

盛代文明日麗天  
墨卿窓戶愛窮年  
未容莊叟談虛白  
欲約揚雄草太玄  
翠琰凝香傳寶刻  
華牋點漆粲瑤篇  
研磨自是經綸手  
祇合青雲友列仙

書輿

奎星高照屋西隅，挿架縱橫萬卷書。  
彩筆夢花孤榻靜，青藜吹火半窓虛。  
天潢尚譜先朝系，官誥猶存世澤餘。  
已有聲名登闕下，苦心何必注蟲魚。

貧樂軒

繁華過眼儘堪憐，古木青山自屋椽。  
三韭香沾原上雨，一瓢冷泛雪中泉。  
賣文敢擬金成匱，問字何容酒滿船。  
風月襟懷天萬里，青春座暖味重玄。

題義兒陳清卷

而翁雙鬢早星星膝下兒郎得寧馨長憶杜陵憐驥子  
不慚周雅賦螟蛉銜哀欲訴心如割舐血多聞舌尚腥  
見說宛丘存譜牒還家終不負幽冥

詠菊枕用吳先生韻

幽花包裹御袍黃一枕勦勦卧石牀老覺形神安晚節  
靜通鼻觀溢秋香蟻醪醉醒疎籬月鶴帳寒驚滿徑霜  
辨得楮衾如白氎夢中紅日上東方

題馬知縣夢雲圖

長日思親慨白雲客窓有夢暮緼緼綠衣恍若樽前舞  
哀角淒然枕上聞千里寸心隨縹緲半牀孤影落繽紛  
騷壇有客誇能賦不數河陽狄使君

題浮玉山房

削成尖玉湧玻瓈疑似崑崙瀚海西寶氣伏藏丹壑暗  
佩聲縹緲彩雲低長材自許充瑚璉高爵終期賜璧珪  
夜月秋深瑤帙啟浮光耿耿燭星奎

送醫士凌伯川歸吳中

浮世生涯藥籠中，佩聲飛渡碧雲重。  
沙河水暖龍遺骨，山苑風晴鹿有茸。  
九轉盡傳丹竈訣，萬言寧待皂囊封。  
吳江歸去春如海，滿眼鶯花錦繡濃。

送胡廷幹歸松江

謫居隴畝慰幽棲，物外游塵不上衣。  
自有阮生青眼顧，也如江總黑頭歸。  
秋風東海蓴鱸熟，曉日西園柿栗肥。  
自此不須談作客，白鷗應許共忘機。

分題得芍坡送李太守

疏鑿咸誇惠濟功使君來守表清風千渠聲合雷車迅  
萬頃光開月鑑空暮雨冥冥騰赤鯉秋雲渺渺落玄鴻  
吾民要覓銘勲處坡上新亭有慶豐

孫叔敖宋封惠濟侯詒詞石刻在固始期思店

送劉推官可成歸長沙

雲杳長沙客思孤涼風千里賦歸歟五雷曾聞神明秘  
一卷猶存法律書岳麓天高搏化鶴屈潭水滿薦嘉魚

作官何似還家樂，仍有丹心戀玉除。

用韻答宋推官廷臣見寄

淮南為客已多年，長憶山中孟浩然。  
鴈信遠隨千里月，鸞章忽報九重天。  
論文願借清風榻，載酒須同碧水船。  
莫道老虔官獨冷，吹噓正待向雲邊。

再用韻三首

蒼髮蕭蕭五十年，文章金石慕燕然。  
壯遊自儼探蟾窟，清夢誰知到木天。  
感興夜聞江上笛，附書曉問海東船。



廣平才子誇能賦詩酒從容共客邊

作客從今儼十年瀛洲東望自悠然金堂玉室真仙窟  
赤水丹山有洞天雲谷曾遊靈運屐雪溪還訪子猷船  
多情為想歸田樂又見君來自日邊

客鄉千里數流年風雨淮山思渺然水遠奕壇送碧海  
雲開仙洞見青天笙歌謾憶秋風宴書畫欣逢夜月船  
公府畫長官訟少輕車須約到芹邊

貽沈茂玄大使索登州硯

登州異產勝端溪即墨封侯品秩躋要使九重分雨露  
便須五色吐虹霓御前漫說宮妃捧海上頻聞使客攜  
莫待人間高著價錦囊好送竹窓西

用韻烏先生留別二首

太古遺音識者稀酒邊一曲悵分違池河共說神魚蜃  
瀛海還看獨鶴飛水濶三江雲縹緲涼生六月雨霏微  
客途爭似還家好過眼休嗟舊事非

老來歸去世應稀功業寧憐與世違淮甸天遙雙鬢改

海城家近寸心飛可應騷客傷遲暮料得詩人賦式微  
鄉社斯文如一綫好令後學認公非

同郡烏先生繼善蒙恩還里過濠上待舟留二旬餘  
予以契家周旋無虛日將行著序為贈先生復留詩  
以別遂用韻以致惓惓併附先生留別詩於後

十載長愁信息稀異鄉相見復相違自慚墮地非千  
里誰似沖天任一飛解帶石邊蒼樹合升仙橋上好  
風微篋中空有南征稿不為從容較是非

送李伯謹同知歸吉安

千里江山似畫圖  
天光如洗雨晴初  
共傳遊子催歸騎  
還道慈親正倚閭  
野水耕畬收黍稌  
芸窓俎席薦鰲蔬  
中都舊日留遺愛  
好屬周南太史書

王漢章以博學授英山知縣  
予以其能繩祖武作詩賀之  
蓋漢章曾伯祖內翰公曾祖常博公兄弟  
相繼登博學宏詞科有名咸淳間者也

咸淳博學有名儒  
先澤猶存五世餘  
曉日楓廷催入覲

春風花縣聽恩除山中好著青箱錄淮上誰傳玉海書  
老我天涯曾作客欲因相見定何如

寄林允原同知

聞君匹馬過邳州不得相從說舊遊  
楓陛仰瞻京國曉棘闌同試太湖秋  
看雲好著圯橋履對月須乘泗水舟  
肯過臨淮松竹底定將詩酒詫風流

送葉主簿伯興歸慈谿

同鄉千里盼瀛洲風雪淮山賦遠遊  
雲暗松廳翻錦帙

香傾棗釀醉瓊舟上新橋外滄波暮大著墳前綠樹秋  
歸語同宗賢弟姪青燈還憶夜窓幽

送盧大使歸潮陽

潮陽久矣望歸來淮水風帆一日開深荷九天滂德澤  
不辭五嶺冒炎埃山中劍氣龍吟匣海上珠光蚌拆胎  
想見故園風物舊題詩正好寄多才

寄烏先生

田園歸去好從容故舊相看夢寐中把鏡尚憐愁鬢白

持盃休惜醉顏紅歌彈長缺風生席曲奏瑤琴月滿空  
應念淮山千里客寄詩須是杜陵翁

寄蔣古巖知縣

外家金紫見英髦譜牒相傳尚未遙蝶夢正酣滄海月  
鸞章忽拜紫宸朝留城落日雙鴻杳汲冢西風萬葉飄  
車騎東來須一見山窓翦燭話清宵

秋興用宋推府韻

日月光開萬歲山蓬萊雲氣渺茫間封疆自古誇幽俗

玉帛從今入漢關  
馴象駕車踰海徼  
真龍立仗育天閑  
帝鄉萬代稱湯沐  
共喜恩波浹宇寰

風生濠上碧流湍  
日照金雞五色翰  
楓岸晴看霜錦爛  
菊籬香挹露珠寒  
附書每欲隨玄鴈  
綰詔何因識紫鸞  
滄海東歸憐驥子  
吳江應已過淮安

玉宇天高對廣寒  
清輝照見酒腸寬  
神蹤要覓三生石  
仙藥須憑九轉丹  
宋璟多應趨宰輔  
鄭虔祇合老儒官  
山川萬里秋空濶  
好趁西風挾羽翰



錦韉花馬抹青芻天上承恩喜賜租出塞將軍聞奏凱  
還朝使者迓先驅露涼松徑悲玄鶴水濶蓮塘浴錦鳧  
犴戶秋清公牘少遠遊作賦託三閭

同鄉舊日訪山居挿架縱橫萬卷書郡府賢良催剡薦  
皇家爵祿慶宣除斯文每逐儀容接公道何嫌職守拘  
櫟散由來天所放廳階日覺往來疎

此身甘似魯諸生汗簡悠悠萬古情試藝聲傳秋院鎖  
論文光動夜窓檠春秋聖筆終麟獲雅頌工歌宴鹿鳴

先澤有傳當不媿朝恩何敢望槃纓

客裏黃花九日杯憑誰織得錦文迴非闕使者徵求急  
可是諸生勸得來老覺丹心終不改愁憐白髮苦相催  
夜深却作還家夢城郭秋聲畫角哀

望鄉遠在海瀛邊茅屋蒼苔問石田夜月上時探兔窟  
寒潮落處抖魚筌踏歌遙聽青雲外射策長懷玉殿前  
千里祇今憐作客焚香再拜祝堯天

次韻答馮道常謝羶襪之惠

書來襪寄紫茸氈霜雪應憐老服虔  
暄暖自須回晚節  
凍皴渾不怕殘年感君高義何能報  
媿我虛名莫浪傳  
為覓靴材如近樣著隨野鶴破蒼烟

附道常所寄詩

臨淮誰坐廣文氈乃是吾鄉老鄭虔  
桂籍題名知第一  
棘闈分手記多年文誇班馬中都盛  
詩儼陰何四海  
傳醉後更能敦宿好鏡銘落紙掃雲烟

送賈惟敬

彩鳳雙飛遠到家北風滿道正塵沙十年客況隨遷謫  
一日君恩拜寵嘉林壑生寒霜落果海途晒日醺浮花  
鄉中故舊多青眼醉倒金樽不用賒

題桂林圖

愛看丹桂倚林皋花下仙人白紵袍應為名家多積德  
不因招隱賦離騷鶴巢聲出青雲表蟾窟香傳玉宇高  
憶向西風曾折取待君初度醉揮毫

題梅檜圖

春夢繁華正可憐  
山深歲暮愛清妍  
疎枝落落初開萼  
老樹亭亭遠際天  
飛瀑聽從千澗底  
懸崖望近片雲邊  
滄溟咫尺蓬萊島  
笑我歸來要學仙

賦南山別墅

笑指南山第一峯  
山中無事得從容  
金銀氣合雲霄上  
紫翠光開澗壑重  
太傅多才傳洛下  
相如有賦憶臨邛  
歲寒正有松梅約  
臘酒香浮琥珀鍾

竹村

竹村深處問仙家  
石洞琅玕長碧芽  
鸞鶴秋高橫鐵笛  
雞豚社近漉烏紗  
山陰越上人相訝  
渭水淇園客漫誇  
喚取陵州文太守  
寶簪谷底問年華

為吳孟舟贈醫士盛元禮

堂前慈母正呻吟  
三聖誰傳太古心  
袖有神鍼投寸鐵  
囊餘寶藥售千金  
杏山香藹紅雲爛  
橘井寒生碧水深  
盛德在人須補報  
欲求丹訣問雲林

送潘學正

緹山講道擁皋比五夜星光耿璧奎帝里恩承紅日近  
仙梯步逐彩雲低不慙徐樂登金馬有待王褒頌碧雞  
笑我同袍華髮早祇須歸老故園棲

送羅副使丁母憂還鄉

縑麻換却老萊衣千里西江賦獨歸可忍叢萱摧夜雨  
多憐寸草報春暉瑤池信逐青鸞杳瓊島仙遊白鶴飛  
媿我無能將贈賻客邊相別淚重揮

和孫大年留別韻

東風花縣幾經春  
夜度秦關月似銀  
陶謝詩名誇得僞  
歐虞碑帖認來真  
客邊敢復留冠蓋  
天上應須列搢紳  
跨馬又成淮海別  
雲霄步武莫逡巡

題春萱堂

雙親鶴髮畫堂中  
生意森森化工夜  
月天高垂翠黛  
午風日暖艷金紅  
舞衣笑奉儀容接  
仙籙欣誇福壽同  
百歲一門歌具慶  
恩封早賜大明宮

寄王漢章



春來見說兩朝天祿官多蒙聖主憐病足敢騎沙苑馬  
歸心忍聽蜀山鷓鴣水亭修禊招賢士月館吹簫候列仙  
尚有掖垣遺稿在手抄應許寄芹邊

予在臨淮手植杏一株越五年而作花賦詩寄郡  
庠諸先生

當年手植近窓紗正待春風早看花絳雪生寒迎曉日  
香綃透暖絢晴霞敢云相國裴公宅不比仙人董奉家  
寄語瓊林新進士朝來載酒好將車

和韻寄開城縣丞孫大年先生

宮錦紅翻御賜衣  
風流文物近來稀  
山中共訝前驅過  
天上同誇入覲歸  
烽火臺詞諧玉律  
古長城調叶清徽  
幽州購得昭仁帖  
好寄濠梁水竹西

先生有烽火臺古長城二樂府故及之

錄大年留別詩

斯文骨肉情均有  
尚友襟懷眼獨稀  
秫酒每邀多士  
飲俸錢曾寄一文歸  
幽花細草披緗卷  
明月清風拂

素徽記得淮山相別處殷勤餞送水門西

用五河縣孫驛丞行簡秋涼感懷詩韻

遠碧亭前翠竹幽多情誰為數詩籌雲霄指點無多路  
淮海從容一半秋客騎鳴鸞行復止官船撾鼓去如流  
登高好寄孫公賦消得吾生萬斛愁

琪樹西風枕簟幽郵程百里報船籌聲傳哀角孤城夜  
夢斷浮槎瀚海秋彈鋏不禁歌激烈操觚聊復寄風流  
河頭見說魚還賤好寄樽前洗客愁

汗簡孤燈夜榻幽老來無計借前籌丹楓影睇龍廷曉  
玉桂香探兔窟秋河漢天高星北拱瀛洲海濶水東流  
客懷浩蕩憑誰寫清唱應須喚莫愁

呼酒鄰家隔竹幽盃行到手不論籌薰葭水濶汀洲暗  
苜蓿涼生苑囿秋解佩正須歸舊隱濯纓還許向中流  
相思坐對濠梁月千里難禁宋玉愁

芹邊自足寄清幽機巧人間不用籌  
蓂莢周迴堯甲子  
簡編筆削魯春秋月涼濠水清如靛  
雨洗淮山翠欲流

為問五河明博士病中應恐不勝愁

水郭人家處處幽太平久已息邊籌  
瑩篴曲奏虹橋月刁斗聲傳雉堞秋  
展席恍驚珠露滴據牀遙指玉繩流  
封書欲寄南飛雁翠竹窓西人正愁

次黃以齋韻壽吳方齋博士

日照扶桑海宇開五雲多處望三台  
且陪坐席春風樂相約林泉晚節迴  
雅調誰歌青玉案碧香同捧紫霞杯  
百年好為斯文壽祇恐天邊使命催

題松存齋

君家種德自先公存得山中幾樹松  
仙籟滿林搏化鶴翠濤滾壑舞羣龍  
九重路與雲霄接百歲恩承雨露濃  
見說明堂求柱石榮華何止大夫封

次韻王文祥見寄

作客彭城又幾春煌煌庠序正興文  
光躔奎宿空中現曲奏霓裳月裏聞  
簪井水枯憐宿草蕭闌路杳盼行雲  
遨遊如過歐陽墓拓得殘碑幸見分

送王敏文自寧夏還四明

同鄉久矣識多才  
淮海相逢一笑開  
世味真能甘淡泊  
客情且復慰招徠  
官槽正熟葡萄釀  
塞曲新傳鸚鵡堆  
千里煩將家信寄  
山中松竹問誰裁

雙親兩地思情悵  
萬里難為一寸心  
於越山川春樹遠  
李王城郭暮雲深  
饌饁要待雙魚出  
綵袖行隨獨鶴吟  
至孝往來應不憚  
為傳作賦擬詞林

用沈茂玄大使錄示令親所寄詩韻就寄

風流人物奈君何  
淮海從容客興多  
夜月光開雲母帳  
春筵曲喚雪兒歌  
日穿林壑啼黃鳥  
雨洗庭階溼翠羅  
正欲扣門同一笑  
歸來星斗看天河

三月春深問若何  
看花應怪落紅多  
騷壇屢掃堂堂陣  
仙館頻聽踏踏歌  
已見良材成杞梓  
更聞嘉好叶松蘿  
天涯誰念瀛洲客  
夢逐扁舟過太湖

陟望軒

一片浮雲伴落暉  
望鄉千里意多違  
天高淮甸冥鴻度



海濶蓬萊獨鶴飛使幕敢辭毛義檄親庭誰舞老萊衣  
百年已注長生籙白髮蕭蕭待汝歸

謝五河孫驛丞魚酒之惠

買得河魚不論錢寄來羊續底須懸烹鮮自可供朝飯  
斫膾須當獻午筵家醞生香傳寶甕詩託興寫金箋  
感君厚賜何能報問訊雲鴻若箇邊

和蕭叔達副使韻兼簡沈大使妙玄沈先生文舉  
風雨愁連上下關客窓易老鏡中顏獨懷滄海瀛洲遠

誰念連天蜀道難  
仙路不聞歌踏踏  
溪橋祇許聽潺潺  
休文自有東城約  
醉後應須借馬還

門巷蕭騷不閉關  
詩翁誰與破愁顏  
擬尋杜位怕泥滑  
欲過蘇端愁路難  
野濶淮天山隔遠  
溪深石罅水流潺  
司征總是登瀛客  
油蓋重重馬上還

贈劉思恭舉秀才入京

生逢盛代慶雲龍  
金帛招延禮意濃  
客路秋隨牛渚棹  
朝班曉聽鳳城鐘  
淮南鴻寶巾箱祕  
太乙青藜內閣重

黼黻文章知有待恩除拜舞紫泥封

壽吳教授先生

泮藻晴香水不冰天街曉見老人星已傳多士成髦俊  
有待佳兒育寧馨就日正頒朝北闕卧雲終擬返南溟  
百年同為斯文壽醉後題詩上錦屏

百歲襟懷一片冰文光笑指壁奎星珍庖曉報侯鯖熟  
寶甕春浮蠟蟻馨科甲久聞探兔窟扶搖直擬化鯢溟  
同袍儘為先生醉淮水淮山看畫屏

次韻答俞明逸先生

仙翁家住海瀛邊六十容顏似壯年夜月夢回蒼玉佩  
秋風吟擁紫茸羶牙籤插架芸香合鶴騎當軒樹影圓  
笑我客居淮水濶白雲千里思悽然

帝里光華日月邊黉宮樂育頌堯年看花曾買春風騎  
翦燭頻吟夜雪璫石韞荆山精璞重水高淮海孕珠圓  
聲歌欲奏清平樂才匪襄陽孟浩然

鴈鴻將信到芹邊琴佩飄零又十年帶草荒蕪通德里

簷花飛洒廣文壇多慚上客瓊琚集空待家人寶鏡圓  
何日歸來丘壑底南山有興賦悠然

中都廷闕五雲邊樂只邦家祝萬年彭澤祇應欣有酒  
少陵何必嘆無壇篆文已賜銅章重綠綬寧需玉琲圓  
鄉社斯文誰砥柱須看大手勒燕然

東海扶桑旭日邊鄉心戀戀已多年長歌竟老馮驩缺  
舊物空存子敬壇雨暗螢窓秋夢遠天高兔窟夜光圓  
獨懷孝子羅江畔松柏瀧岡涕泗然

寄宋廷臣

憶昔濠梁贈別時，斯文千古付襟期。  
吁嚶不作人前態，慷慨當為天下奇。  
北客尚令思若水，南冠今已釋鍾儀。  
裁書欲寄雲邊鴈，香染西風灑墨池。

白髮慈親正倚閭，天涯游子快歸途。  
過門賓客頻攜酒，問字兒童競挽鬚。  
江海多情傳翰墨，園籬有興託樽壺。  
我今亦欲投簪去，東望滄溟夜月孤。

廷臣上道謂予曰：我死公當作傳，其志亦可悲矣。

史行可憲副眷兄過臨淮以詩見貽次韻識別

天開聖運粲人文五色詞葩吐異芬錦里光重丞相府  
青山氣藹大卿墳淞江科第登高甲涿鹿名聲迴出羣  
冠豸又看持憲節封章應徹薶旒聞

附錄史憲副詩

每憶臨淮鄭廣文百年書帶藹清芬德尊不在論資  
品官冷惟知究典墳春水濠梁魚樂意秋風莊浪鴈  
離羣過庭昔日傳詩禮深媿陳亢叩異聞

次韻許上舍廷慎見貽

湖海交遊遇服虔中都分得廣文壇  
孔門冠佩三千士魯史春秋二百年  
懷慶風流今復覩瀛洲譜牒古來傳  
白雲試問山中信祇欲同歸賀老船

附錄許上舍詩

拓落深悲老鄭虔白頭依舊坐寒氊  
修名自昔誇三絕薄宦于今又十年  
楊子立成人未識左思賦出世  
爭傳文章得失千秋事鑑水何時共酒船



次韻許廷慎立春詩

東風吹散土牛塵，綵勝花重綺席春。  
羽士書符傳遁甲，侯門奏樂宴同寅。  
天垂廣野星杓近，地濶長淮雨澤新。  
為愛襄陵千里客，菜絲盤玉慰親情。

禁柳迎春舞萬條，東風綵燕迓新朝。  
乾坤垓圻洪鈞轉，江海昇平玉燭調。  
郊祀獻歌傳漢武，寅賓分職仰唐堯。  
鳳城預有看花約，須待揚鞭過畫橋。

題賴思順雲林讀書深處

愛向雲林縹緲間何如李白在匡山每令童子移書帙  
時許仙人颯佩環講罷風生幽壑底夢回月到碧溪灣  
勞生正厭塵遮眼杖履何由共往還

潞州陳節判叔銘過臨淮惠紫團參一本作詩貽  
吳教授

上黨人參五葉齊紫團山頂碧雲西來尋金線重樓草  
教斲丹崖五色泥具體宛然分手足按方時許入刀圭  
懸知上藥無炮炙解使仙翁壽域躋

題廣信府李經歷仲謀聽松軒

高住松崖最上層  
玉人踞佩不勝清  
翠濤洶湧蛟龍舞  
仙籟蕭騷鶴鶴驚  
笑指釣天談昨夢  
擬煩樂府變新聲  
山人要識陶弘景  
風月秋高許結盟

題採芝卷

清歌縹緲逐雲行  
采采芳華澗谷春  
雪鬢老如商嶺客  
絳衣朝儼漢廷臣  
療飢不待香炊玉  
酣醉何辭草當茵  
笑我銅池應有頌  
願隨步履上星辰

和韻答余德載

春深來訪浣花翁  
座席紅翻芍藥風  
樽酒可能如北海  
辦香何敢儼南豐  
鷓鴣聲隔千山遠  
燕子泥香一徑融  
笑我浮生空潦倒  
斯文多幸付諸公

天涯誰復為情親  
櫟散襟期莫比倫  
徐邈儘令誇酒聖  
魯褒何苦著錢神  
月宮有桂曾通籍  
溟海無槎可問津  
把鏡却憐雙鬢雪  
多君遠訪玉溪濱

送淵上人壁潭歸弋陽

悟得真如不用參法旌華雨落貌貌須知有相原無相  
莫問前三更後三杖錫多緣隨覺路袈裟寧欲換朝衫  
山中猿鶴歸相迓圓壁天開月在潭

洪武十九年夏五月不雨廣信郡太守番禺彭公  
推府靈臺李公率所屬及父老民人禱於羣祠祝  
詞甫畢甘雨隨至三日之間四郊沾足賦詩志喜  
用以見二公精誠所致云

霖雨蒼生素有懷天心昭格衆心諧虛簷坐使翻銀竹

廣畝同看長翠  
芳雲暗蛟龍歸遠  
海水高魚鱉上長街  
朝來送喜千家遍  
却道先生語類俳

瑤闕欣聞帝寵嘉  
滂沱甘雨遍天涯  
溪流渺渺來千里  
雲氣重重冷萬家  
儘使豐年多黍稌  
也從七月詠禾麻  
廣文喜作襟期在  
清夜長吟絳燭花

天澤從今大有年  
山花野草亦欣然  
馨香始信神靈格  
歌詠咸誇郡府賢  
穀粟豪家須落價  
魚蝦近市不論錢  
若將汗簡書奇績  
太史文章筆似椽

桑麻精禱思冥冥一片丹衷徹帝聽  
巖瀑高懸河漢白山田深沒水雲青  
芸窓浥潤通書帙燕寢生涼透石屏  
瞻仰昊天覃化育羽人請誦玉皇經

用彭太守喜雨韻

誰奏封章徹帝宮蜿蜒滄海奮神龍  
陰重兵鐵驅雲騎隊逐旗旌散雨工  
送喜定容蓬島客醉歌欲效杜陵翁  
文章大手多燕許相業須傳濟旱功

商羊縹緲舞層空澗谷深深起螭龍  
閭閻九重傳帝命

雲霓千里沛神工有年喜續麟經筆樂事欣傳鶴髮翁  
爭似威明賢太守恩波湛湛不論功

用彭太守述懷韻

府庫頻支月賜錢青雲有路作腰纏拜恩北闕文奎近  
讀律西窓絳燭然自許生來忠貫日何期身後畫凌烟  
黃堂晝靜清如水化育咸歸刺史天

雲錦囊空不問錢老來寧許百憂纏廣文貧似陳無已  
明府才如孟浩然綠水光寒珠孕月青山氣暖玉生烟



南州千里誇形勝仰戴皇家日月天

按公詩首云莫道為官不要錢要錢自可作盤纏人心如此不如此天意不然真不然語雖麤俗亦可以觀其所守矣然不數月而以招贓瘐死悲夫

和同知錢相公登高韻

南屏步入翠雲高香折泥封醉碧醪仙洞聲遲蒼玉佩  
賓筵光動紫羅袍幸逢王化歌麟趾正及朝家聚鳳毛  
何似廣文官獨冷山齋松竹聽蕭騷

琅峯晴睨九秋高  
雙榼香攜玉色醪  
歌韻有情須著筆  
笑談無事幸同袍  
山深草木成鱗鬣  
海濶雲霞落羽毛  
採得菊花黃滿地  
西風歸騎晚飄蕭

用錢同知美推官能弓韻

馬上彎弓氣勢豪  
星流點點破纖毫  
鴈鴻仰笑當空落  
猿狖悲憐抱樹號  
羅賓功成蠻寇殄  
天山凱奏將材高  
請看衛武賓筵秩  
莫問兵家有六韜

聲華不數五陵豪  
目極秋空落兔毫  
匝風生鳴翠駁

僕姑月滿控烏號一言中戰兵應解百步穿楊藝絕高  
要待澤宮觀揖讓諸生未儼習龍韜

贈繆如璧

靈山佳氣逼雲霄憲節當年闕閱高手澤尚傳蒼竹簡  
宮恩猶認紫羅袍考槃詩詠時方泰束帛榮華運更遭  
有約林泉須一到松花細採釀春醪

上饒繆氏世家靈山以姓係地號曰繆原其先名君  
寶號泉山者仕宋紹陵官至江東提刑持節識獄名

震一時後有字如璧者實其三世孫云如璧古樸慎  
重奉提刑公貌像簡冊數十年如一日縉紳君子樂  
稱道之而宜黃涂先生幾守約且以慎顧言行為辭  
是得贈出與處之道矣如璧已老而克從祝規豈非  
世家賢子孫哉書曰紹聞衣德言其如璧之謂乎予  
教廣信二年如璧修刺禮謁出示此卷因歌二律併  
識其後以歸之時洪武二十年歲在丁卯正月上元  
日四明鄭真謹識

用金太守韻兼上

闕

同知

闕

推府二公

佩襟濟濟盼秋波共迓春風五馬過海寓車書今日威  
山城絃誦近來多愛聞召伯棠陰化驟聽漁陽麥秀歌  
名教不應無樂地廣文已老奈公何

東風雜還聽鳴珂倅守朝歸喜見過花壓重城春入畫  
芹香泮沼暖生波玉函捧表天顏近彩筆題詩官況多  
却笑馬周貧作客有懷不敢望常何

再用太守金公雪中韻

天葩灑灑遍山城捲起重簾眼倍明晃蕩乾坤春有象  
飄蕭松竹夜來聲何煩走檄催滕六胡不當筵喚麴生  
上客梁園誰奏賦好仙爭得與同傾

題同心卷

湛湛靈臺一鏡空清光照見兩情同結盟不用銅盤插  
講學相期鐵硯功泮藻來游聽夜雨桂宮聯步待秋風  
古來管鮑稱知己願汝相望百歲中

用金太守寫懷及登天寧寺樓韻

南屏山色近虛簷  
公館年來樂意添  
香熱沈烟春靄靄  
醉歌湛露夜厭厭  
海棠欲睡紅當席  
萱草忘憂翠隔簾  
彩筆生花成五色  
共傳清夢似江淹

曾將樂府擬三臺  
錦繡胸襟絕點埃  
帝闕封章須特奏  
客廳俎席為誰開  
紗窓夢醒牀依竹  
石徑行吟履印苔  
騶從平安頻得報  
東風落日尚遲徊

梵王樓閣似長干  
面面溪山作畫看  
鶴騎影迷千里信  
鯨魚聲報五更寒  
法師笑指靈峯近  
詞客休歌蜀道難

長日登高須有賦分明寶樹識琅玕

嘉禾崔彥齡以母在瓊州陳詞通政司啟東宮報  
可徒步奉迎過廣信寓宿數日作詩以贈

嶺海馳驅萬里天慈親相對淚如泉狀供政府原非妄  
啟八儲宮俯見憐旭日錦萱春藹藹冷風玉樹月娟娟  
版輿早候來歸日擬補南陔小雅篇

三月廿八日陪府官詣東岳廟行香獻壽律詩二首  
華構翬飛萬疊山黼帷祇在殿中間風聲颯颯傳神語



燭影煌煌近帝顏  
遠岫樹低雲補缺  
清溪石礙水流灣  
殘碑認得先朝刻  
願道當年二聖還

神旂雙引拂空冥  
鸞鶴踟躕下翠屏  
獻壽自須通秘祝  
謳歌還許出優伶  
花攢綺席盃傾碧  
火熬珍庖俎割腥  
麾導前驅催上馬  
山風吹雨灑清泠

廟中有石刻宋紹興間故物有伏願二聖回還之說  
可見先朝民俗忠厚不忘其君之意讀之慨然

滎陽外史集卷九十三

欽定四庫全書

集部

柴陽外史集卷九十四

五

詳校官編修<sub>臣</sub>程槐

中書<sub>臣</sub>劉源溥覆勘

總校官降調編修<sub>臣</sub>倉聖脉

校對官典<sub>臣</sub>簿郭祚熾

謄錄監生<sub>臣</sub>徐保

欽定四庫全書

榮陽外史集卷九十四

明 鄭真 撰

七言律詩

寄闡仲猷

高住龍山第一層  
千年永續祖師燈  
天都入覲恩光重  
日本歸來道價增  
浪帖補胆瞻寶像  
雲開落石布金繩  
上方刻得新碑製  
笑我淮南見未曾

識得真如是佛身焚香上祝聖明君龍王聽法來滄海  
獅子牽車向白雲琬琰宸章金作刻袈裟御賜錦成文  
投簪幸得歸來早應願山中半榻分

賦鶴瓢盃用方叅政韻

仙驥雲深早蛻胎誰將霜骨鏤崔嵬香流玉液風生座  
影浸金波月上臺詩客莫誇椰子棹山翁何羨水精盃  
醉來傲晚乾坤濶髣髴瑤池賜宴回

用前題別賦一首

骨相虛涵造化機仙家酒熟許挑攜青雲誓與歸華表  
白月須同泛碧溪興託箕山心似石夢隨遼海醉如泥  
傾銀注玉人堪笑回首崆峒落日迷

用方文敏新春試筆韻

滿堂裾翠織如蔥春在淮山錦繡中河漢天高瞻北斗  
瀛洲人遠問東風昇平鼓樂千門合混一車書四海同  
見說詞林供帖子上尊琥珀賜醅紅

贈臨淮生六人赴京

陸好德

傳家遠自陸宣公典誥文章卷帙重序列諸生欣造就  
生當盛代幸遭逢彩雲曉署瞻閭闔碧藻晴香詠辟雍  
天外公車催上道鶯花三月正春濃

李英

龍蟠虎踞仰王都浩浩風雲屬壯圖莫使荆人空抱玉  
宵令越客暗投珠聽鶯曉日開丹幃躍馬春烟散紫衢  
老我祇甘淮海上煩君多謝魯諸儒

孫起

春風上國許遊遨  
濟濟衣冠總俊髦  
天近蓬萊翔紫鳳  
水高淮海奮蒼鼇  
慶門垂裕年方壯  
寰宇同文運更遭  
寄語成均姜博士  
老來為客尚臨濠

王勝祖

風滿長江月滿山  
擔書祇為叩賢關  
杏林春色身先到  
桂窟秋香手可攀  
天拱宸樞瞻漢闕  
月臨朔望換朝班  
狀元釋褐今應見  
覲省萱堂謁告還

陶德成

我來見汝尚為兒手挾明經日問題歲月恍然成老大  
林泉寧復事羈縻神京赫赫環江海學省煌煌近壁奎  
鼓篋早登髦士選竹窓莫厭五更雞

蔣禮

丰姿梧竹見清修一卷周詩志欲酬曉日當厨催鼎饌  
夜蟾照席挂燈篝鑄成鐵硯頻攜手會使朱衣獨點頭  
上舍御前春釋褐家聲好繼山亭侯



贈虹縣生劉昭貢成均

煌煌學省近青霄淮海諸生喜見招  
挿架籤題翻錦綺升堂裾佩聽瓊瑤  
胙分俎豆春秋祀班簞庭墀朔望朝  
文教原知今日盛好將歌頌獻唐堯

送臧惟表詩

并序

四明臧氏為文獻名族其始祖大丞公宋高宗  
時扈蹕南渡為翰林御藥嗣後科第相繼珪組  
蟬聯至於元初魯山公南冠入見世祖持節左

欽定四庫全書

澤陽列女  
卷九十四

憲所著座右銘列諸憲府天下傳頌去魯山數  
世而惟表際今聖朝試藝中選授臨洮府蘭縣  
丞三年以稱職聞可謂克世其家者矣予客濠  
上值其考滿與論世家之契作詩以贈之

魯山繡斧舊家聲三字猶傳座右銘  
錄官遠經秦樹碧  
壯遊遙指蜀天青  
牛酥和酒寧辭醉  
羊腩充庖不怕腥  
客底相逢同一笑  
海雲深處思冥冥

送黃彥機

洪武癸丑予以湖省鄉貢計偕春官莆田黃公  
彥機亦以閩省進士謁選吏部因與論同年之  
好彥機四如先生曾孫理學文章卓有源委予  
心敬服之及來典教中都屬邑數年而彥機奉  
上旨為鞏昌府通渭縣丞歲時請覲取道濠梁  
握手論舊茲書滿上考彥機謂人生聚散無常  
不可無一言以別予老矣無能為矣玉京天上  
夔龍接武非彥機其誰哉遂賦詩以致期望之

意云

兩省同年進士科斯文契誼果如何春雲濶步公須早  
夜雨羈愁我獨多邊笛頻聽青玉案山盃不厭紫芝歌  
相逢又說朝天去花柳東方散佩珂

答黃仲埧檢閱見寄蕪簡吳伯宗內翰

煌煌華蓋近奎文玉宇天高覩慶雲秋露每憐三徑菊  
春風猶憶泮池芹王言潤色毋多讓尚食傳餐莫浪分  
簪紱老逢臺閣選好將忠赤報明君

鈴索無聲玉漏殘  
文淵閣上逼高寒  
恩光頻對雙蓮炬  
壽考何須九轉丹  
蘭殿早朝隨喚仗  
花磚晚步候鳴鸞  
斯文說有吳夫子  
淮海相望欲見難

附黃檢閱詩

闕

題莆田羽士雲所卷

仙家樓閣望三山人在祥雲縹緲間每欲隨風歸洞府  
曾因作雨向塵寰劍光變幻鼉鼉窟丹氣氤氲虎豹關  
笑我無心從去住蓬萊頂上候瑤環

送表兄范執中復任靈壽縣知縣

系出文華學士公誰知異姓本同宗相逢共詫形容老  
入覲應誇步武重燕馬春郊肥苜蓿淮船秋水映芙蓉  
端歸寵賜南宮宴一曲周歌湛露濃

題畫二首

曾過坡仙放鶴亭黃茅岡頂思冥冥相親有客須拌醉  
好語逢人不倦聽一水傾翻千澗碧兩厓浮動半天青  
舊遊恍惚渾成夢聊復題詩上畫屏

古木藤蘿翠雨飄重巒絕壁倚雲霄坐隨行徑秋多露  
渡喚長江晚有潮機事相忘鷗影隻封書欲寄鴈飛遙  
十年虛負瀛洲約愁聽仙家奏玉簫

送鄢陵教諭高思聰辭官歸金華之武義

長淮千里放歸船記得相逢五載前薄宦不須論教鐸

醉歌且復共賓筵  
天官試卷存遺藁  
詞苑菁莪取次編  
如過金華山下路  
煩君致意牧羊仙

答姚宗文律詩四首

門掩西風一徑苔  
懸知勿藥好懷開  
不辭上客停雲騎  
何羨佳人當肉臺  
蒼鬢不應甘老去  
青衫只擬早歸來  
向時已悟盃中影  
莫為多情賦七哀

淮天空濶彩雲收  
坐對青山最上頭  
幽夢祇應隨化蝶  
閒心儘可狎來鷗  
胸中繡錦休停織  
袖裏驪珠莫暗投



籬落菊花秋已近浮菴還許喚同遊

一曲清歌聽採蓮夕陽高樹正鳴蟬山川風氣千餘里  
詩酒襟懷四十年妙藥人間夸不死靈符海上詫逢仙  
幾回笑指揚雄宅問字終當造席前

高節多君慕子陵憐予祇似出家僧床頭相問頻能去  
燈下長懷可自勝嗜酒誰云賒即得賣文獨怪價難增  
客鄉願得身强健要覓山中木與苓

附宗文詩

送林生歸樂清

萱堂有命過淮西  
矯首雲霄百尺梯  
綵袖庭階朝進鯉  
青編燈火夜聽雞  
家聲儼續梅花詠  
客興頻將柿葉題  
最喜迺翁多善政  
歸來歷歷話中閨

寄徐景顏三首

秋榜名聯進士科輕舟同日沂淮河舉頭天際雲雷迅  
揮手人間歲月過大府祇今辭滿牘黌宮仍復聽升歌  
馬融絳帳知何似解榻還嫌禮數多

帝鄉城郭楚天涯倦客西風兩鬢華終許徐君歸

闕

豈容賈誼困長沙曉窓獨對青銅鏡夜榻虛燒絳燭花  
淮潁相望雲漢接遠遊祇欲趁星槎

鄭虔多病更多愁却笑文章死不休泰運重逢堯甲子  
師傳頻纂魯春秋敢云闕下郎官老誰識周南太史留

科甲向來叨第一西風竟負廣寒遊

用韻寄王漢章三首

山中報政兩年餘卓魯聲華總不如遺蹟向來詢漢楚  
淳風今得問廬舒據鞍自覺丹心壯照鏡應憐綠鬢疎  
楚澤天高鴻鴈遠短歌空復賦三閭

花縣仙人玉雪清科名詞學早蜚聲共知簪紱家傳久  
多羨絃歌德化成千里山川鯨海島五雲宮闕鳳陽城  
故人相見多青眼狂客誰憐賀四明

年過半百未容間縣宰今躋七品班隴上恩須金誥贈  
堂前笑待錦衣還蓬萊雲近通三島閭闔天高睇九關  
海宇會同春正月紫宸行復覲龍顏

送潘伯英

將軍幕下羽書稀花柳輕風散馬蹄古篆多應題玉筋  
梵書謾憶寫金泥天連河漢恩光近雲擁蓬萊步武躋  
老我白頭淮海上煩君問訊故園棲

送莊浪衛千總所王鎮撫朝覲領誥而還

虎衛煌煌塞上開將軍多仗出羣材湛盧光動星橫漢  
感策聲殘月滿臺鐵馬沙場精教閱金城部落藉招徠  
功成催入龍廷覲綵鳳綾花拜賜回

題綠陰深處

蕭蕭松竹翠交加五里橋南處士家化育儘令饒雨露  
山游終許載雲霞巖花亂發雙扉暗澗水潛通一徑賒  
老我已忘塵俗念長生試欲問丹砂

題吳道延書屋

錦軸牙籤插架高座中上客盡英髦雙鉤妙訣頻臨晉  
五字新篇祇和陶辟蠹春來教汗竹聚螢夜半代焚膏  
勸君好富三餘學鼓勇詞場戰必鏖

題梅雪卷

銀海光搖六出花晴香一樹映窓紗誰陪東郭先生履  
遠訪西湖處士家皜素本來同造化清寒不許炫豪奢  
捲簾愛索羣姬笑取水春烹雀舌茶

五月初一日太守試闔府縣諸生命予為主試初

六日揭曉太守有詩次韻

藝戰中場甲榜開南州多士慰招來昇平正遇君臣會  
俊造須期將相材詞學盡誇慕北海經題頻問呂東萊  
明公藻鑑歸公論耿耿中天玉鏡臺

題碧山詩卷

山翁結屋倚空青猿鶴招呼月裏聽流水落花春寂寂  
白雲深樹畫冥冥久知妙法超三昧仍許離騷賦獨醒  
老我尚耽丘壑趣籃輿擬欲叩松扃



上金太守府尊一首

攜家共覩郡公來五馬趨迎一笑開  
不羨笙簧喧北里却欣歌誦補南陔  
九重恩擬絲綸誥百歲香傾琥珀盃  
信筆要書耆碩傳老生不敢讓非才

題金郡公待月樓卷

晚涼人在畫欄東海底金輪湧碧空  
羽舞霓裳隨縹緲仙遊環佩颯空濛  
葡萄滿注香尤烈檀板輕敲曲未終  
願與嫦娥覓靈藥奮身同上廣寒宮

夜宿谷神道院為吳道紀子璵稱壽宴罷作詩以謝併貽同志諸君子

星滿銀河月上弦  
玉溪光泛水中天  
遨遊如在珠璣窟  
燕樂還勤錦綺筵  
希有年華兼福壽  
風流文物總神仙  
樽餘更許明朝醉  
踏踏空歌夜不眠

和金太守述懷韻

甘棠陰轉翠簾虛  
坐對溪山畫不如  
五彩騰鸞阿閣鳳  
九霄變化北溟魚  
斯文共覩分符日  
大用還誇發轍初

可是龔黃循吏傳他年弗媿史臣書

每欲揮毫賦子虛非才空愧馬相如彎弓却道雲無鴈  
彈鋏多應食有魚芸屋泥香朝雨後竹牀月透夜涼初  
諸生沐浴文翁化坐擁皋比聽讀書

和韻奉答金郡公仲和太守父也

貂蟬七世仰華宗千里南來識郡公庾亮許令延夜月  
光庭容得坐春風花邊雅戲懽娛洽竹裏行庖燕笑同  
厚德在人須有報廣文莫道錦囊空

碧沼涵空石徑幽潭潭公府慰相求步兵寵顧多青眼  
工部愁吟奈白頭蟻榼香傾甘露滑花箋濃染翠雲浮  
芹邊笑我清如水有約西風桂子秋

連雨有喜上金太守錢同知李推官

瓣香多見格天心一滴甘霖一滴金畎畝嘉禾成樂歲  
乾坤清氣滌塵襟舟移九曲山溪遠綆汲千家石甃深  
太史簡書煩志喜廣文才淺不成吟

折桂贈金郡公

萬里西風桂子秋  
梯空誰向廣寒遊  
曾將姓字通仙籍  
敢望恩榮賜狀頭  
金粟粧成涼月滿  
麝脐香透晚雲浮  
一枝折贈蓬萊客  
好約嫦娥共勸酬

寄古芳禪師

上方形勝占祥符  
矯首靈山似畫圖  
火暖雲爐然櫓杌  
酒香春甕勝醍醐  
西天教演真乘祕  
東魯書探滿架儲  
見說夜來禪定起  
一龕坐對月明孤

送知上人禮補怛

補怛洛迦山在寧波府昌國東大洋海島上觀音示現之地予家四明於大士為同鄉弟子海波險絕不及一至典教廣信而鉛山上人永智若愚不遠千里武拜而前必欲瞻仰慈相而止予嘉其意之誠志之堅也作律詩為贈按補怛洛迦梵語華謂小白華以山多白華故云

滄海天遙雪浪堆補怛山頂幻樓臺多因大士尋常現盡喚遊僧自遠來獅子吼林巖壑震頻伽出洞樹雲開

袈裟坐向盤陀石認得前身是善財

寄羅信言

道來不肯扣丹扉秋水羅江看夕暉  
席上香寒花竹譜山中雲暖薜蘿衣  
教兒儘把韋經讀作客還誇趙璧歸  
江海天遙音問少寸心長與鴈同飛

再用韻

粉榆藹藹蔭重扉醉倚闌干駐落暉  
搗月須求雙玉杵翦雲欲製五銖衣  
蓬萊有路須同到靈鷲多年未得歸

想見家山新孝享慈烏常遶樹頭飛

靳子英巡檢寄贈虎皮作詩以謝

寄來弓箭虎皮斑想像威風百步間  
肯令戎豔誇雪白未容蜀錦炫朱殷  
寢牀不覺驚魂夢講席多應發笑顏  
感荷情親無以報題詩附與片雲還

賀蘇如初下第復職

先生試罷早歸來春滿黌宮講席開  
謾道劉蕡猶不第誰知賈誼本多才  
鯢鵬海上終高奮鷗鷺沙頭莫浪猜



過眼可應迷五色且須談笑付樽罍

題南州別墅

聞說南州逸興饒相期解榻過山腰神仙樓閣還同到  
使者弓旌不受招雲擁重巒喬木暗風隨幽徑落紅飄  
抱琴誰鼓清商調五色鸞凰下沘寥

送玉山汪生起復入國監端明學士狀元拱辰公  
之後也生號冰玉堂就題

溪山水玉產魁儒法從恩承祕殿除雲匝凝香猶有笏

牙籤挿架尚多書  
照人清氣寒仍冽  
滿眼晴峯畫不如  
文獻百年論嗣續  
從今魯寶識璫璵

題鑑湖曉霽

鑑湖晴漲白鷗波  
賀老風流問若何  
蠻賈趁墟酬市語  
洞山踏月聽空歌  
夾堤菱芡經時熟  
入郭魚蝦近日多  
我亦有心探禹穴  
須君同賦考槃阿

落第舉人南昌張某特恩授温州永嘉縣學教諭  
兼簡劉貢禹學正

丹符躬拜御前除試藁猶存棘栴餘宣聖殿高瞻衮黼  
諸生班整肅襟裾華堂擊鼓公厨熟綵鷄垂簾海味腍  
為語睢州劉博士老年易學定何如

題孫氏紫荊堂家在淮安山陽縣先七世不分宋  
南渡思陵嘗幸其家

將軍堂植紫荊花淮海山陽憶故家奕世雲初同饌席  
前朝恩寵駐鸞車簾攏鈎曉溥珠露座榻凝香覆晚霞  
見說孫枝還秀發年來應許著芳華

寄史行可

八行傳家盛有人科名青紫不如君契囊錯落傾珠斗  
使節光華拂錦雲賈誼有名傳洛下王通隨意教河汾  
不才亦有田園興擬共攜樽醉夕曛

昆季從來識二難每從過者問平安久交自許如金石  
遠信何由託羽翰拄笏看山雲冉冉研朱點易露溥溥  
卦爻會要新傳得寄與燈前仔細看

寄史君實

月湖公子泮池深老却平生富貴心  
寶鈇歌殘星斗落  
紫簫吹斷鳳鸞吟  
秣香樽蟻杯頻泛  
燭翦釵蟲夜向深  
若幸廣文歸去早  
午風花下定相尋

翠竹窓紗易一編  
焚香孤坐晤幽玄  
從知太極原无極  
始信先天祇後天  
龍虎風雲當盛代  
貂蟬閥閱素多賢  
笑看喬梓青如蓋  
灑灑涼陰雨露邊

寄金太守仲鼎錢同知闕時二公得罪屯田天

寧衛

身世悠悠任所從要知文武古來同  
寶裝好買千金劍  
努力須扳兩石弓  
共說關張多意氣  
要知韓范本才雄  
凌烟閣上蒼空近  
願畫丹青第一功

當年幕府幸同僚  
今日兵農塞北遙  
願把金貂誇此世  
好將鐵券認前朝  
霜天雲杳書傳鴈  
水泊風高學射鵰  
聞道竹筒堪吸酒  
胸中磊砢且須澆

松亭嶺外草如茵  
部落誰為向日民  
土屋雨霜寒寂寂  
石煤然火暖溫溫  
曉厨莫笑畦無菜  
晚地猶誇麥有粃

休道陽和終不到天涯風物也相親

送董理問

名家勲績伍公槐前代班行冠上台御賜尚存犀角帶  
軍容猶識虎頭牌雲仍誰似如今盛風烈何能與物諧  
天闕入朝歸路遠也須騎馬過茅齋

又

名家喬木藁城深忠孝悠悠百世心盤綬正須傳錦繡  
虎符猶得認黃金談經竹屋秋雲合聽訟槐庭晝日陰

忠獻只今祠廟在蕭蕭柏徑許相尋

送括蒼王罕成母喪歸

丹符拜領過長沙老覺蕭蕭兩鬢華  
聖主恩深頻得祿慈親訃遠急還家  
仙遊悵望雲天鶴反哺愁聽月樹鴉  
江廣歲寒冰雪苦繽紛清淚溼衰麻

問梅江西王叅議索賦

玉妃孤住碧巖阿一笑相逢問若何  
骨格可隨凡俗換精神較與向來多  
幾迴姑射山中去何事羅浮月下過



歲晏天寒冰雪苦幽情肯與共婆娑

玉山縣學教諭蘇如愚先生謙恭樂善待予如師  
在任四年以母喪去職作詩以贈云

白髮慈親福壽終家山有賦託冥鴻蓬萊影沒仙游旆  
泮水聲殘講席鐘萱草生寒愁滿眼蓼莪哀賦淚填胸  
儒官歸去征衫舊須記燈前密密縫

贈俞敬之

早歲親承古雪公契家三世仰清風芝蘭楚楚賓墀近

橋梓輝輝旅席同，庾嶺天高催驛騎。  
稽山雲杳託邊鴻，青春舞綵如多暇。  
須約斯文賦泮宮。

題松竹軒

亭亭華構倚晴空，松竹溪山罨畫中。  
翠鳳羽毛低夜月，蒼龍鱗甲動秋風。  
三公夢入瑤臺遠，六逸吟聯綺席同。  
笑我同鄉須一過，倚窓坐對燭花紅。

寄玉山關知縣

君住天台我住明，相逢千里亦多情。  
政須蒼石銘詩刻，

不羨銅盤軟血盟  
潘岳春吟花似海  
陶潛晚嘯柳如城  
斯文甚荷風聲接  
此屋絃歌樂治平

滿城風雨落花深  
望望溪山思不禁  
笑我窮經空白首  
多君視篆祇丹心  
壽春欲解時苗犢  
單父頻聽宓賤琴  
誰是玉堂揮翰手  
墨卿須致竹窓陰

寄玉山董縣丞

蟬聯華胄本江都  
三策天人百世餘  
對竹風聲來衽席  
哦松日影過階除  
當筵愛飲盃中物  
成案寧辭紙尾書

笑我山居同澗水少微星動夜牀虛

寄玉山典史

去年竹簫寄曾來老病蹢躅亦快哉長史祇應多眷愛  
教官爭奈少輿儻玉溪水影明清鑒婺女星光毓俊才  
有約芹邊須過我午風香藹錦蓮開

和烏先生見寄韻

貞心澄默與天通虛白涼生一榻中共喜西河尊子夏  
儘教蜀郡慕揚雄浮塵要刮金篦膜皎月長吟玉樹風

江水西流千里隔祇將幽意託冥鴻

東南地重四明山人在金堂玉室間彭澤陶潛終勿仕  
鑑湖賀老竟辭還學仙志欲求三島報國心猶戀九關  
想見水仙灣上路碧雲步步逐瑤環

附烏先生詩

誰道西江信不通故人消息坐談中十年官冷身無  
恙一郡名高筆最雄仙闕每瞻龍虎氣客途長嘯馬  
牛風獨憐老去年華短空拂春雲望斷鴻

遙望鵝湖與象山昔人談道五雲間  
片言共覩遺珠在叔世能追大雅  
還玉氣和烟浮暖谷金精隨月到  
重關先生訪古寧無意謾謾涼風  
響佩環

題五雲漁舍卷

越王臺外五雲低漁隱人家結構齊  
可是嚴陵居大澤肯令呂望老蟠溪  
冰蟾照夜珠胎折琪樹生寒翠羽棲  
隣郡相過如欲賦却須橙蟹搗金齏

予讀五雲漁舍卷什越中大手筆若趙公待制錢公

博士及王公前學正皆先執友而錢公較文淞江時  
實有座主門生之契文獻老成詞極思致興懷存歿  
實增敬想欲著賦以續其後而以病弗果口占律詩  
用期諸異日云

美董縣丞孝行

此心純孝古來同祿養其如拱木風哭笋簇寒驚土迸  
求魚衣解訝冰融羹牆恍若神靈見泉隧多應祀享通  
老我儒林當作傳史才媿不似諸公

題胡仲厚先生畫

樓閣重重最上頭  
石橋有路接蓬洲  
多才欲著興公賦  
適意須招太傅遊  
棘屋半藏巖日曉  
松關深鎖澗雲秋  
郭熙自得忘言趣  
掛壁爭看醉墨流

中秋寫懷

客中多病更多愁  
孤負山城一半秋  
獨處嫦娥空想像  
老來詞客謾風流  
君山曾奏千年笛  
牛渚誰乘萬里舟  
想見家人心獨苦  
金波應與淚同流



欽定四庫全書

卷一百一十五

二十四

榮陽外史集卷九十四

欽定四庫全書

滎陽外史集卷九十五

明 鄭真 撰

七言律詩

寄象山區禪師寰中

尊師不見已多年  
夢遠蓬萊瀚海天  
杖錫行隨雲共遠  
牟尼光對月同圓  
許詢自欲酬支遁  
韓愈終當友大顛  
老我歸尋丘壑趣  
靈山席上定參禪

和百戶韻

柳營深處綠依依，雉堞雲屯壯國基。  
誓欲斬蛟臨沔水，賸誇躍馬過檀溪。  
婺城盛說東萊學，渭水猶傳呂望碑。  
文武一家今有後，撫摩戎伍煦寒飢。

七言長律

三月四日會飲於方德貞氏以上已寒食清明比  
合於兩日間要予賦詩成二十韻

春深節序適逢三，松竹南窓客聚簪。  
香冽上樽傾鑒落

珍分列鼎飫肥甘巖花不為人情別海味應當旅思堪  
誓與阮生同一醉肯如王衍祇清談交親半世猜嫌絕  
土俗千年委曲諳道在底須愁做擾心清自可律頑貪  
路深鳳浦停烟火海濶蛟門息瘴嵐聲動鞦韆喧院落  
影搖舴艋漾溪潭笙歌歷歷哇淫雜羅綺紛紛富貴酣  
公子多應聯曉騎佳人擬為祝春蠶青精飯熟家人送  
銀燭光分內寵覃祭祀誰能通孝享祓除聊復慰憂悵  
軒裳分與浮榮棄泉石由來懶性耽虛壁蟲飛憐尺蠖

畫梁燕語聽呢喃越中曲水流清淺綿上諸山聳翠嵌  
逸少立言名不朽子胥守義死何慚氛塵浩蕩紛爭急  
戈戟精明禍亂戢未有長材空冀北敢辭微命困周南  
屋簷柳色官袍映几席芸香汗簡探興聚筆端詩欲就  
簾前飛絮落毵毵

寄陳縣尹可齋

爛柯仙客思翩翩獻賦曾聞近御筵鸞詔香浮朱印溼  
鵷班光映赭袍鮮生逢明聖焦勞日壽介慈親喜懼年

色養望遙千里道忠心誓答九重天  
化覃海邑聲威肅名動樞廷禮貌專  
山市春深聞促仗官衙晝靜聽鳴絃  
東風柳影青絲颺長日萱花錦繡妍  
潘岳豈能長作縣陶潛未可賦歸田  
囊中詩帙尋常看肘後醫方次第編  
尚想軒居新畫幃依依情動白雲篇

壽方時可七十

生年七十正逢春長為湖山作主人  
黃紙親承天寵洽祿袍喜動日華新  
神仙早授長生訣道德常存不老身

瓊島雲霞酣入眼璇霄風月喜傳真五枝挺挺庭前桂  
一樹青青雪裏椿地接東溟回造化天開南極爛星辰  
宗枝展慶威儀接嗣續趨歡禮讓均綵勝花翻紅影動  
金觴壽介碧香醇滿堂光映珊瑚架拂席寒重錦繡茵  
顧我誠非朱履客敢因祝頌齒簪紳

春草軒長律用黃仲瑱先生韻

芸屋題春筆似椽翠茵藹藹欲霏烟懸知生物從元化  
共說芳心祇舊年香吐雜花成百和陰擎低柳候三眠



身前正儼春暉報夢後多應晚興綿上國濠梁隨浩浩  
故鄉蓬島憶芊芊自家意思何人識努力工夫信手編  
指佞廷階嗟已矣忘憂杖履覺悠然儘令雨露青青在  
寧羨繁華綺米鮮

題周府紀善南閩黃昌吾愛日堂

金烏飛駕五雲重照見高堂鶴髮翁大化要同歸壽域  
長生久矣得仙風南州天際扶桑碧西海雲連若木紅  
笑近榆陰移枕席步隨花影遶簾櫳綠樽香泛春常滿

綺綵衣翻年正中寸草芳心終欲報餘暉戀戀倚晴空  
題廬山圖送鳳府掾童思謙

年來有夢入匡廬列嶂芙蓉看畫圖天近雲霞浮几席  
風生澗壑奏笙竽雜花織就千機錦飛瀑傾翻萬斛珠  
鸞驚出巢翔廓落蜿蜒奮蟄幻虛無草堂正可尋棲隱  
槐府何煩肅步趨彭澤歸來聯法社長庚攬結擬仙都  
芸香晚砌書連架秫熟秋田酒滿壺送子名門雙闕下  
蕭蕭清思眇江湖

用陳闕韻就為榮歸之贈蓋上饒縣丞乃父也

吾家本住海瀛東千里南來語笑同  
閉戶不禁孤榻靜隔籬還許一溪通  
芹香泮藻簪裾集花遶庭除杖履從  
展席歌殘青玉案燒燈光透絳紗籠  
酒樽泛月頻傾蟻劒匣鳴雷欲化龍  
水宿恍如明鏡裏山遊祇在畫圖中  
全身自愛歸田樂教子長懷報國忠  
有約重來風雪底飄飄鶴氅訝王恭

七言挽詩

挽盧承事

衣冠鄉社集耆英風月蕭然兩鬢星祿養已應酬鼎釜  
恩光終復耀泉扃塵荒夜榻遺編暗雲滿春山宰樹青  
嗣子相逢憐作客天涯歸擬勒新銘

九月廿日夜夢韓生唯傳動靜如常時而面黃慘  
臃腫予意傳其死者之妄不以為夢也覺後成詩  
一首時殘月印衾雞聲喔喔譙樓已四鼓矣為之

悽絕

曾將幽意寄冥冥夢裏相逢淚欲傾地下不知成久別  
人間空復話生平才名每惜邢居實貧病多慚馬長卿  
老我歸來丘壑底餘哀擬作楚歌聲

挽徐方舟先生方舟睦州詩人有瑤林滄江集號滄  
江散人天大雪獨泛舟釣江中壽六十八以卒宋  
學士銘其墓曰有才不施一發於詩日星月露草  
木走飛人事變遷可悅可比

闕

入我範圍

唾咳所及皆成珠璣信乎能詩矣

睦州詩派繼前修急雪滄浪一釣舟  
賸有才華傳錦繡終無姓字徹珠旒  
神魚入穴江雲暮仙鶴搏空海月秋  
百歲風流那復見薤歌聲斷不勝愁

挽李廷鉉

山人本自號瓊臺未到瓊臺忽訃哀  
太白騎鯨終弗返令威化鶴欲歸來  
海南莫副羣黎望江左空憐太守才  
尚想蘆軒行樂地秋花晚節為誰開

按瓊州郡名瓊臺廷鉉得守萬安正瓊臺屬邑予嘗

作書貽之曰公號瓊臺山人今領州紱乃在瓊臺豈  
非佳識耶

挽王廷采

西風槎上擬張騫留得南行第一編共嘆棲鸞空棘枳  
却憐化鶴渺雲烟江湖淚灑丹旌溼廣海魂歸畫翬懸  
慈母九原如不識遺容須憶畫中傳

廷采生十月而母  
死號所居此思軒

挽陳惟學

戀主依依盼玉除遺編忽復啓青烏傷心過客空臨穴

姑素慈親正倚閨月透虛囊應有劍塵荒故榻尚留鉏  
淮南九日年年到惆悵黃花酒滿壺

少時江海望南遊三十年來過涿州諸父相逢心獨苦  
老姑一見涕橫流粉榆日薄林泉暮松柏風生澗壑秋  
千里英魂渾欲返雲霄鶴唳不勝愁

按惟學世居涿州東南三里惟學三歲侍父官游江  
南克守家牒年三十餘際今聖運得授滄州判官以  
公事至北平取道涿州經故里彷彿記憶駐馬郵亭



亭長有同姓者鬚鬢皤然問得其實知其從父行  
延至上坐拜伏成禮叩其姻族其祖姑尚在相見涕  
泗入山拜其曾祖元帥公墓金時穹碑固在既返自  
北平為汎掃隧徑割牲以祭州長貳鄉黨父老來享  
胙皆以為陳氏尚有人焉臨別親族咸致贈遺惟學  
既得罪其從父迎慰道上復資助路費是其有親親  
之恩者耶惟學謫濠梁每假宿予所寓為一言之惟  
學已歿無有知其事者特附著挽歌辭後以見追念

本始之意而其他出處不得詳也惟學有母年七十餘寓居湖州嘗手書語惟學曰吾姑素期福以待汝歸汝好自愛烏乎母子茲不復見矣痛矣哉洪武十二年九月重九日子與惟學飲酒鳳陽郡學又一日來寓舍飲酒如平時未幾訃惟學死矣是月十七日也年四十有四以是月某日葬於鳳陽縣月湖西畔棺槨衣衾之具朋友以義助經紀其葬事者天台洪原禮姑蘇吳孟周氏其生死尤得其力者則邵州判官

山陰陳惟仁云

挽黃仲塤先生

三度科名藹縉紳老來八十際昌辰  
裸將自許從周祀羽翼終煩列漢臣  
淮海傳經應有子雲南作志屬何人  
英魂不返華亭鶴愁絕天涯淚溼巾

哭崔孝子

孝子名某姓崔氏字彥齡嘉禾人  
幼時失父某母某氏政事同里桑某  
桑為御史謫海南後以

大臣奏還事而死氏嫠居海南孝子徒步祇迎  
不能得歸嘉禾逾半載入京師以情叩通政司  
啟聞東宮可其請再走海南得母以還旅次南  
昌竟以利下疾死識者莫不悲之噫是豈造物  
者之不仁也耶孝子往返累次假信宿于賓館  
穀之臨別許為著傳孝子今死矣存歿之情可  
終已矣耶因作詩哀挽之併書其繫用竊比掛  
劍之義云

兩渡南溟萬里遊春暉欲報思悠悠儲宮上啟恩仍泱  
慈母同歸志竟酬至孝不聞來福壽大招忽復些冥幽  
九重閭闔何由訴執筆空煩涕泗流

悼羅舜言

聞君縲紲不歸來猿鶴聲傳夜壑哀自信書生無死罪  
誰知獄吏陷多才彈歌有劍塵藏匣展卷無燈月上臺  
謾道府君靈廟在枉教嗣續罹凶災

榮陽外史集卷九十五